



# 文學山房叢書

(民國)江杏溪輯

四川出版集團  
巴蜀書社

雕菰集卷二

江都焦循著

荒年雜詩

三月無雨種四月無雨栽昨宵雨若鎬猛至驅塵埃東  
鄰摘野蕨西鄰蒔園萊園萊葉黃蝨野蕨根傾頽

采采山上榆榆皮剝已盡采采墓門茅茅根不堪吮干  
錢二斗粟百錢二斗糠賣衣買糠食兒女賣牛買粟供  
耶孃無牛何以耕無衣何以煖休問何以耕休問何以  
煖未必秋冬時一家猶在屋

未死不忍殺已死不必覆出我橐中刀剗彼身中肉瓦

醵燒枯苗煎煎半生熟羸瘠無脂膏和以山溪菽生者  
如可救死者亦甘服此卽妻與孥一嚼一號哭哭者聲  
未收滿體乍寒縮少刻氣亦絕又滿他人腹

稚子啼路旁哀哀歲六七問兒何爲啼不食已二日昨  
從阿耶來今早阿耶去言去乞水漿置兒卧此處行者  
憐其孤攜歸備驅馭餓久腸胃枯不堪任充飫

孤村苦盜賊相集防不虞鳴鐃出林竹張炬然溪蘆初  
昏迄黎明遠近聲相呼攀木坐屋角四顧時彎弧叢榛  
有人匿互警施刀鈇一炬草木盡衝煙走雄狐

春作農家子冬爲求乞兒豈無百畝田泥土難療飢親

鄰亦如此稱貸將何之不甘閉戶死猶望長者施一家  
六七口沿路相追隨亦云春月至還家耕新菑昨夜北  
風起老父死高隄稚子凍斃盡霜雪埋其屍妻子曉辭  
去不知曾夫誰顛栗卧野寺衣淺難支持餓死在旦夕  
名姓孰問知

縣令乘車來省視災與饑蠕蠕村中民匍匐前致詞形  
骸骨立語孱弱長官救我呼聲遲長官向民語爾眾勿  
傷悲一日告大府三日奏 天墀有錢買新絮有米炊  
香糜事無十日遠少俟無遷移蠕蠕村中民匍匐稱仁  
慈拜送長官去相顧形嬉嬉

富人有長者捐米施餽粥架厰環數畝邑宰坐中屋咽  
啄桑中蠶旁午散南北家有父與母老病久枵腹哀告  
給半筐將歸救窮蹙

丙午二月末嚴寒勝殘臘裸體蹲門檐驅之莫容內背  
倚相爲笛男女任叢雜孰知骨瘠冷不容霜華著肉吹  
寒風皮黑若漆痛不覺頭顱如散心如空終夜喔喔預  
鬼泣曉來滿地橫僵蟲昨日死十七八今日死廿三四  
荻樵卷如蠶一穴百十埭君不見農夫餓死西原頭鳶  
鳥攫腸犬食臂

李貞女詩

古者不室卽不父葬不入兆廟無主上殤立後惟大宗  
士庶未昏死卽腐俞家郎年十五瓦棺只合埋園圃如  
今立嗣如成人祭薦不絕名載譜子承祧孫繼祖誰之  
力歟李貞女貞女二八年父母將別許貞女矢志志不  
移血淚垂垂語師姆投繯白刃吾所甘恨不捐生入泉  
土一死徒傷父母心死者泯沒終無補誓將以妾存吾  
夫竟入夫家守貧窶二十喪服除三十操春杵四十殯  
尊章五十諸姪撫六十遭凶荒糠粃衣藍縷今年七十  
稱稀古白髮飄蕭尙勤苦女而不婦誰之云同心何必  
生同處或云未嫁義可斷此言迂腐殊齟齬前朝未仕

歸新朝往往慙慙假此語吾恐猶羞見此女

巴貞女挽歌

貞女者何巴氏女張子繼室聘未娶行年十七聞夫凶  
前婦遺兒二歲許兩家父母愛惜深未行昏者可從父  
再嫁之禮禮所詳貞女大笑周公腐夫面未見穴可同  
兒包未懷身可撫柏舟旣矢母諒人洒然竟入張家宇  
輪三周兮御者誰轡車素白淒秋雨桃天天兮霜烈烈  
鴛帳空兮纔帷舞婦未成兮母德全撫摩盡瘁忘寒暑  
孰知天道不可測檐前老菟啼聲怒臘月雷轟六月冰  
嬰兒攫去苛於虎懷內珍珠亦已空胸中金石原如堵

青裙獨守夜風清女自甘兮人若苦吾聞貞女幼讀書  
女箴閨範皆全睹讀書如此乃真儒不識字兮光與禹  
今以戊申十一月痛哉發痘歸泉土九年節操蕙蘭香  
清泉皓月堪爲伍僭效龍門太史筆丰神描畫遺千古  
世有杜夔歌此歌柔面男兒色或沮

姑惡惡

有序

哀枉不申也伶人妻淫畏婦見迫汚之婦拒不從以剪  
刀殺於雪中伶人故伺候巨室不知妻淫且衛妻託巨  
室屬邑令又以錢賂婦家遂不理也

姑惡惡不敢言姑惡姑惡惡不敢隨姑惡此身既許夫

此身不許姑姑心不念子妾心不念死妾死化作東門  
榆東門榆莢稱無姑妾死不化姑惡鳥不言姑惡言姑  
好兩親不訟官不追妾陰爲之爲姑保

趙氏門前杞

有序

趙氏子取未久游於遠方十年妻守無他志書至曰吾  
不歸子可以嫁矣婦怨而死

趙氏門前杞青青向溪水君始出門去送君雙立此君  
留青絲纓妾贈昏時纏別時妾十七屈指延一紀歡喜  
開君書華萃忽飛絮知心孰如君信妾未他去知身別  
有婦欲妾別有夫趙氏門前杞對此獨躊躇新枝別將

無舊枝今摧枯君猶念妾身妾懷君厚情欲生如情何  
欲嫁如情何

周縣丞奴

有序

周縣丞奴陳德者越人也臺灣賊起周被執奴左右之  
十餘日及周遇害奴奮殺賊賊支解之

主人食者君之祿奴所食者主人粟海隅狂魅興妖氛  
主人罵賊義不辱賊羣如鬼團風沙賊刃如霜落喬木  
頭顱斷矣聲猶蒼血飛一天滿地肉主人行勿速小人  
殺賊來追逐

雲貞行

有序

集二

五 文學山房

女子雲貞其夫以罪戍邊寄以書關吏啟之辭深婉嫺  
麗有詩人汝墳君子于役之風寶應朱君士彥志之以  
詩事可見矣書中有楓亭分手之語其傳爲仙遊縣人  
也

耶戍伊犁城妾住仙遊縣萬里一封書開書當妾面耶  
本武健兒負氣樂勇戰涼秋木葉脫禽肥出沙甸耶騎  
青王虬右挾僕姑箭一發斃雙狼聲名塞人羨耶而猶  
如昔年年春夢見

哀小甲

有序

小甲某執盜於市盜刺之至死不釋時壬子冬至前十

日也

奉職無貴賤盡忠無顯微茲冬苦不雨盜賊鑽城扉東  
家困失米西家篋亡衣城西有小甲發奮獨呀呬夜別  
妻與女朝別兄與母我任在驅賊賊擾我色沮幼女啼  
牽衣叩出須早歸壯士瞋目怒拂衣去不顧瓊笠短後  
衫持挺俟邑路慘慘市橋月烈烈衝冠髮一賊伏深巷  
擊刺起倉卒壯士未及防白刃飛秋霜身遇十數創格  
鬪聲愈張行人遠避匿邏卒失人色天昏朔風黑身死  
賊亦得義勇如斯人捐軀得其職以之作將帥孔武報  
王國以之作守令循良必堪式所惜未知書知書者何

如

虎鯊吟

有序

吹沙小魚俗謂之虎鯊湖中人張瓦取之以當蔬菜乙巳丙午湖水旱涸種類頓絕八九年矣今秋復繁衍如昔足爲豐年安樂之象因詠其事

年歉魚頓竭年豐魚復生小物不足記生死關民情憶昔值荒歲有田無能耕農夫率妻子就食梁與荆荆梁遠復遠途路嗟難行制府川中來巨艘移新杭居者不餓死散者歸鄉閭畜牧漸蕃息倉困漸充盈婚嫁締新特滋生孩嬰小者善啼哭大者能趨行驅雞衛糧穀

侯門習送迎鄰里具斗酒勸樂相囂訇農夫暗垂泣衷  
苦言難明閨中舊有婦凍死無墳塋膝下舊有子賣往  
他鄉城聚首更何日恨淚空頻傾

惠民阿姊行

有序

惠民縣有殺人一家而火焚其屋者於燼中得一臂一  
鉄其女懇諸縣縣不理轉相懇者五年甲寅畢撫軍來  
閱案牘知其冤適總督兩湖以是屬繼撫王公廉之果  
得被殺狀置前不受理及訊鞫不實者於法國人快之  
且壯女之不屈也

阿姊年十九阿弟年十一阿姊咽咽向弟說耶孃慘變

賊潛逸阿姊抱屍臂阿弟持鉄鐵俯伏公堂叫地天長  
官大怒聲如裂爾父及母天所災誰與健訟唆兒來兒  
泣不能語姊泣欲語官不許坐兒誣懇飭隸拘與姊持  
抱相哀呼姊憤懇於上上官受其狀定案誰能翻冤沈  
咎以謗反復悲鳴秋復春形容骨立衣如鶉指天自誓  
誓以死大仇不雪吾不已龐娥刺刃終非謀惟望

朝廷代爲理至誠所格天垂閔攫挈烏雀來鷹隼五年  
疑獄一朝伸行道之人涕爲隕讐人戮阿姊病一孱女  
子見天性阿姊歸長官走民冤不理誰之咎

番薯吟

有序

定海諸生李異占家赤貧謹於事母授徒數里外每食必歸食已復至主人怪之詰以故久之乃曰家貧母食番薯何忍獨飯也學使訪得實表之又給以金始卻不肯受語以歸養母乃感泣再拜持去

母食米兒食薯母心不豫母食薯兒食米兒能不泣涕海水洶洶浪拍天中有斯人行獨賢使君與金謝不受無名得此身之咎使君曰女勿卻姑買市中珍歸爲賢母樂李生叩首納金去兩眼紛紛淚如雨

甬江棄婦行

有序

鎮海諸生劉赤江棄其妻丁別聘於姜丁歸母家守志